



ДОРНОГОВЬ АЙМАГ
ИРГЭДИЙН ТӨЛӨӨЛӨГЧДИЙН ХУРЛЫН
ТОГТООЛ

2023 оны 03 сарын 22 өдөр

Дугаар 11/01

Сайншанд сум

“Нээлттэй Дорноговь аймаг” зорилтот
хөтөлбөр батлах тухай

Монгол Улсын засаг захиргаа, нутаг дэвсгэрийн нэгж, түүний удирдлагын тухай хуулийн 21 дүгээр зүйлийн 21.1.6, 48 дугаар зүйлийн 48.1, 48.2 дахь заалт, Засгийн газрын 2022 оны 11 дүгээр сарын 23-ны өдрийн “Хот, хөдөөгийн сэргэлтийн бодлогын хэрэгжилтийг эрчимжүүлэх талаар авах зарим арга хэмжээний тухай” 419 дүгээр тогтоолыг тус тус үндэслэн аймгийн Иргэдийн Төлөөлөгчдийн Хурлаас ТОГТООХ нь:

1. “Шинэ сэргэлтийн бодлого”-ын хэрэгжилтийг эрчимжүүлэн үйлдвэржсэн хөгжлийн тулгуур аймаг болж, хүний хөгжлийг дэмжсэн орон нутгийг бий болгон шилжин ирж суурьших иргэд, аж ахуйн нэгжид ажиллаж, амьдрах таатай орчныг бүрдүүлэх замаар аймаг, сумаа хөгжүүлэх зорилго бүхий “Нээлттэй Дорноговь аймаг” зорилтот хөтөлбөрийг хавсралтаар баталсугай.

2. “Хөтөлбөр хэрэгжүүлэх арга хэмжээний төлөвлөгөө”-г батлан хэрэгжүүлэх, шаардагдах зардлыг аймгийн төсөвт жил бүр тусгах, хөтөлбөрийн хэрэгжилтийн тайланг бүтэн жилээр аймгийн Иргэдийн төлөөлөгчдийн хуралд тайлагнаж ажиллахыг аймгийн Засаг дарга (О.Батжаргал)-д үүрэг болгосугай.

3. Тогтоолын хэрэгжилтэд хяналт тавьж ажиллахыг Нутгийн удирдлагын хөгжлийн хорооны ахлагч (И.Батсүрэн), аймгийн Иргэдийн Төлөөлөгчдийн Хурлын нарийн бичгийн дарга (Ц.Батсугир) нарт тус тус даалгасугай.



ДАРГА

Б.ГАНЗОРИГ

442230002

Аймгийн Иргэдийн Төлөөлөгчдийн Хурлын
2023 оны 03 дугаар сарын 22-ны өдрийн
14/01 дугаар тогтоолын хавсралт



**УЛААНБААТАР ХОТООС ОРОН НУТАГТ ШИЛЖИН
ИРЖ БУЙ ИРГЭД, АЖ АХУЙН НЭГЖ, БАЙГУУЛЛАГЫГ
ДЭМЖИХ “НЭЭЛТТЭЙ ДОРНОГОВЬ АЙМАГ” ХӨТӨЛБӨР**

2023 оны 03 сарын 22-ны өдөр

Дорноговь аймаг

Нэг. Нийтлэг үндэслэл

Монгол Улсын Их Хурлын 2020 оны 52 дугаар тогтоолоор батлагдсан “Алсын хараа-2050” урт хугацааны хөгжлийн бодлогын баримт бичиг, 2021 оны 106 дугаар тогтоолоор батлагдсан “Шинэ сэргэлтийн бодлого”-ыг хэрэгжүүлэхээр ажиллаж байна. Тус бодлогын баримт бичигт боомт, эрчим хүч, аж үйлдвэржилт, хот хөдөөгийн тэнцвэрт хөгжил, ногоон хөгжил, төрийн бүтээмж зэрэг 6 багц асуудал туссан.

Өнөөдрийн байдлаар нийслэл Улаанбаатар хотод манай улсын хүн амын 50 орчим хувь нь төвлөрч, төрийн төв байгууллагууд 100 хувь, их дээд сургуулийн 90 хувь, худалдаа үйлчилгээний салбарын 86 хувь, аж ахуйн нэгж байгууллагын 70 орчим хувь нь байршиж байна.

Сүүлийн 20 гаруй жилийн хугацаанд орон нутгаас Улаанбаатар хотод шилжин суугчдын тоо 875000 хүрч, 2021 оны жилийн эцсийн байдлаар Улаанбаатар хотын хүн амын тоо 1539252 болж, хот, хөдөөгийн хүн амын харьцаа тэнцүү болсон байна.

Нийслэлийн хүн амын энэхүү эрчимтэй өсөлтийг дагаад хүрээлэн буй орчны доройтол, дэд бүтцийн даац хэтрэх, бүс нутгийн тэнцвэрт бус хөгжил, хотын ажилгүйдэл, ядуурал ихсэхээс гадна хүн амын хэт төвлөрсөн байдал нь хот болон хөдөөгийн хөгжлийн ялгаатай байдлыг нэмэгдүүлж нийгэм, эдийн засгийн сөрөг үр дагаврыг бий болгосоор байна.

Түүнчлэн Улаанбаатар хотын хэт төвлөрлөөс үүссэн бэрхшээлүүд нь оршин суугчдын нийгмийн суурь үйлчилгээг тэгш хүртээмжтэй авахад хүндрэл учруулж, тодорхой зохицуулалтгүй үргэлжилсэн шилжилт хөдөлгөөний улмаас хөдөө орон нутаг, ялангуяа хязгаар нутгууд эзгүйрч, сумын хөгжил цаг үеэсээ хоцрогдож байна.

Тиймээс хүн амыг нутаг дэвсгэртээ тэнцвэртэй нутагшуулан суурьшуулах, нийслэл Улаанбаатар хотоос орон нутагт шилжин суурьших иргэд, аж ахуйн нэгж, байгууллагыг дэмжих зайлшгүй хэрэгцээ үүссэнийг Засгийн газраас шийдвэрлэхээр ажиллаж байна.

Хот хөдөөгийн тэнцвэрт хөгжлийг хангах зорилтын хүрээнд орон нутгийг хөгжүүлэх, Улаанбаатар хотоос орон нутагт шилжин суурьших иргэдийн ажиллаж, амьдрах нөхцөл боломжийг нэмэгдүүлэх, орон нутагт үйл ажиллагаа явуулах аж ахуйн нэгж, байгууллагуудыг дэмжих зорилгоор “Хот, хөдөөгийн сэргэлтийн бодлогын хэрэгжилтийг эрчимжүүлэх талаар авах арга хэмжээний тухай” Засгийн

газрын 2022 оны 11 дүгээр сарын 23-ны өдрийн 419 дүгээр тогтоол, Засгийн газрын хуралдааны 56 дугаар тэмдэглэл гарсан.

Дээрх шийдвэрүүдийн хүрээнд Монгол Улсын Ерөнхий сайдын 2022 оны 157 дугаар захирамжаар байгуулагдсан ажлын хэсгийн 2022-2024 онд хэрэгжүүлэх ажлын ерөнхий төлөвлөгөөгөөр салбарын яам, засаг захиргаа, нутаг дэвсгэрийн нэгжүүдийн авч хэрэгжүүлэх ажлын чиглэлүүдийг баталсан.

Ажлын хэсгээс өгсөн чиглэлийг хэрэгжүүлэхээр “Алсын хараа-2050 урт хугацааны бодлого”, “Шинэ сэргэлт”-ийн бодлогын үзэл баримтлалд нийцүүлэн аймгийн Засаг даргын үйл ажиллагааны “Хөгжлийн төлөө хамтдаа-2” хөтөлбөрт орон нутгийн онцлогийг тусгасан бие даасан хөтөлбөр, төлөвлөгөө батлан, хэрэгжүүлэхээр нэмэлт зорилт, арга хэмжээг тусган аймгийн Иргэдийн Төлөөлөгчдийн хурлын 2022 оны 10/05 дугаар тогтоолоор батлуулсан.

Иймд аймгийн Засаг даргын үйл ажиллагааны хөтөлбөрт нэмэлтээр тусгагдсан зорилт, арга хэмжээг хэрэгжүүлэхээр орон нутгийн өнөөгийн нөхцөл байдал, нөөц боломж, аймгийн түүх, соёл, зан заншил, уламжлал, оюун санааны үнэт зүйлс, нийгэм, эдийн засаг, техник, технологи, үндэсний үйлдвэрлэлийн ололт амжилтыг шилжин ирэх иргэд, аж ахуйн нэгж, байгууллага, олон нийтэд мэдээлэн сурталчлах “Нээлттэй Дорноговь аймаг хөтөлбөр” (цаашид “Хөтөлбөр” гэх)-ийг холбогдох бодлогын бичиг баримт, хөтөлбөр, үйл ажиллагаа, судалгаанд үндэслэн боловсруулсан болно.

Хоёр. Хөтөлбөрийг хэрэгжүүлэхэд баримтлах зарчим

2.1. “Нээлттэй Дорноговь аймаг хөтөлбөр”-ийг хэрэгжүүлэхэд дараах зарчмыг баримтална.

2.1.1. Монгол Улсын хууль, хөгжлийн бодлогын баримт бичиг, холбогдох үндэсний хөтөлбөрүүд, аймаг орон нутгийн бодит нөөц бололцоо, бүс нутгийн эдийн засгийг кластержуулан хөгжүүлэх, орон нутаг өөрийгөө бие даан санхүүжүүлэх эдийн засгийн бодлогод тулгуурлах;

2.1.2. Хөтөлбөрийн агуулгад аймаг орон нутагт шилжин ирж ажиллаж, амьдрах үйл ажиллагаа эрхлэн явуулахад үүсэх давуу тал болон үүсэж болзошгүй хүндрэл бэрхшээлийг зөв тооцож тусгахыг эрмэлзэн мэдээллийг нээлттэй, тэгш, хүртээмжтэй түгээхийг чухалчилсан, хувь хүн, аж ахуйн нэгж, байгууллагад хуулиар олгогдсон эрхийг дээдлэн хүндэтгэсэн, үүрэг хариуцлагыг ухамсарлуулан таниулж хандлагын өөрчлөлтөд уриалсан, бизнесийн орчны тэгш боломж, шударга өрсөлдөөнийг эрхэмлэсэн, хөгжил дэвшил, бүтээн байгуулалт, хөрөнгө оруулалтын таатай орчин, олон талт харилцааны онцлогуудыг уялдуулан тодорхойлсон байх;

2.1.3. Хөтөлбөрийн хэрэгжилтэд иргэд олон нийт, хувийн хэвшил, иргэний нийгмийн байгууллагууд, бизнесийн болон мэргэжлийн холбоодын оролцоог түлхүү дэмжих.

Гурав. Хөтөлбөрийн зорилго

3.1. “Шинэ сэргэлтийн бодлого”-ын бодит хэрэгжилтийг эрчимжүүлэн, улсын хөгжлийн тулгуур аймаг болж, үйлдвэржсэн, боломж дүүрэн хөдөөг бий болгон шилжин ирж суурьших иргэдэд таатай орчныг бүрдүүлэх замаар аймаг, сум орон нутгаа хөгжүүлэхэд хөтөлбөрийн зорилго оршино.

Дөрөв. Хөтөлбөрийн зорилт

4.1. "Нээлттэй Дорноговь аймаг хөтөлбөр"-ийг ажил хэрэг болгохдоо дараах зорилтуудыг хэрэгжүүлнэ:

4.1.1. Аймгийн онцлог, түүх, соёл, өөрсдөд буй боломж, нутгийн брэндээ ард түмэнд таниулах, эдийн засгийн өсөлтийг эрчимжүүлэх замаар аймаг орон нутгаа хөгжүүлэх;

4.1.2. Иргэдэд ажиллаж амьдрах, аж ахуйн нэгж байгууллагад үйл ажиллагаа явуулах таатай орчныг бүрдүүлэх,

4.1.3. Эдийн засаг, нийгмийн харилцааг хөгжүүлэхэд дэмжлэг үзүүлэх;

4.1.4. Мэргэжлийн ажиллах хүчний хомсдолыг багасгах, аймгийн хөгжлийн тэргүүлэх чиглэлийн тодорхой салбарын хөгжлийг эрчимжүүлэхэд хүний нөөцийг бэхжүүлэх, албан хаагчдыг чадавхжуулах чиглэлээр сургалт явуулах зэргээр зорилтот хөтөлбөрүүдийн хэрэгжилтийг дэмжих;

Тав. Үйл ажиллагааны тэргүүлэх чиглэл

5.1. Хөтөлбөрийг дараах чиглэлд тэргүүн ээлжинд хэрэгжүүлнэ:

5.1.1. Амьдрах таатай орчин бүрдүүлэх, дэд бүтцийг өргөтгөх, төсөл хөтөлбөр хэрэгжүүлэх, уялдаа холбоог хангах, хөрөнгө оруулалт татах чиглэлд идэвх санаачилга гаргах;

5.1.2. Улсын хэмжээнд үйл ажиллагаа явуулж буй аж ахуйн нэгж, байгууллагуудтай хамтын ажиллагааг идэвхжүүлж аймагтаа ажлын байр нэмэгдүүлэх;

5.1.3. Боловсрол, эрүүл мэндийн салбарын үйлчилгээний чанар, хүртээмжийг сайжруулах;

5.1.4. Үндэсний үйлдвэрлэлийг нэмэгдүүлэх, аймгийн брэнд бараа, бүтээгдэхүүн, үйлчилгээг бий болгон сурталчлах, үйлдвэрлэл, аялал жуулчлал гэх мэт бодит хөрөнгө оруулалт оруулах салбараа эрэмбэлэн хөгжүүлэх, иргэдийн тогтмол орлого олох боломжийг эрэлхийлэх;

5.1.5. Төр хувийн хэвшлийн хамтын ажиллагааг эрчимжүүлж, иргэд, аж ахуйн нэгж, байгууллагуудыг мэдээллээр хангах, тэднийг аймаг орон нутагт шилжин ирж суурьшин амьдрах сэдлийг төрүүлэх, хандлагыг өөрчлөх, амьдрах таатай орчин бүрдүүлэх, мэдээллээр хангах чиглэлд манлайлан оролцож, холбогдох үйл ажиллагаа, арга хэмжээнүүдийг зохион байгуулж тогтмолжуулах;

Зургаа. Хөтөлбөрийн удирдлага, зохион байгуулалт

6.1. Хөтөлбөрийн хэрэгжилтийг аймгийн хэмжээнд удирдан зохион байгуулах үүрэг бүхий дэд ажлын хэсэг (цаашид "ажлын хэсэг" гэх) ажиллана. Ажлын хэсгийн ахлагч нь Монгол Улсын Ерөнхий сайдын 157 дугаар захирамжаар байгуулагдсан ажлын хэсгийн гишүүн, аймгийн Засаг даргын орлогч байна.

6.2. Ажлын хэсгийн бүрэлдэхүүнийг аймгийн Засаг дарга батална. Ажлын хэсэг нь 35 хүртэл гишүүнтэй байх бөгөөд боловсрол, эрүүл мэнд, хөдөө аж ахуй, аялал жуулчлал, газрын харилцаа, хэвлэл мэдээллийн болон санхүү, төсөв, төлөвлөлтийн асуудал эрхэлсэн ажилтны төлөөллийг заавал оруулна. Түүнчлэн

Улаанбаатар хот дахь нутгийн зөвлөл, бизнесийн байгууллага, иргэний нийгмийн байгууллага, мэргэжлийн холбоод, эрдэмтэн судлаачдын төлөөллийг зөвшилцлөөр оруулж болно.

6.3.Ажлын хэсэг аймгийн хэмжээнд хөтөлбөрийг хэрэгжүүлэх арга хэмжээний төлөвлөгөөг боловсруулж аймгийн Засаг даргаар батлуулна.

6.4.Аймгаас мэдээллээ нээлттэй түгээх зорилгоор Улаанбаатар хот болон бүс нутгийн түвшинд зохион байгуулагдах үзэсгэлэн худалдаа, форум, хурал зөвлөгөөн, спорт, соёл урлагийн арга хэмжээнд оролцож аймгаа сурталчлах асуудлыг Ажлын хэсгийн ахлагч шийдвэрлэх ба шаардлагатай тохиолдолд аймгийн Засаг даргатай зөвшилцөн Засаг даргын зөвлөлийн хурал болон Иргэдийн Төлөөлөгчдийн хурлын зөвлөлийн хуралдаанаар хэлэлцүүлнэ.

6.5.Дэд ажлын хэсэг олон нийтэд мэдээлэл хүргэх, сурталчлах, үйл ажиллагааг Засгийн газрын дэргэдэх Ажлын хэсэгтэй хамтран нэгдсэн журмаар зохион байгуулах бөгөөд аймгийн хэмжээнд шинээр бий болсон ажлын байр, тухайн салбарт дутагдаж буй шаардлагатай боловсон хүчний судалгаа, шилжилт хөдөлгөөний бүртгэл зэрэг аймгийн нээлттэй мэдээллийн нэгдсэн санг бүрдүүлсэн байна. Улмаар төв мэдээллийн сантай мэдээлэл солилцох ажлыг орон нутаг дахь бүртгэл хариуцсан ажилтан шуурхай зохион байгуулна.

6.6.Хөтөлбөрийн хэрэгжилтийн явцад ажлын хэсгээс тогтмол хяналт тавьж, хагас болон бүтэн жилээр хэрэгжилтийг дүгнэн хэлэлцэж, аймгийн Засаг дарга, ИТХ, Засгийн газрын Хэрэг эрхлэх газарт тайлагнана.

Долоо. Хэрэгжүүлэх хугацаа

7.1.Хөтөлбөрийн эхний шатыг 2023-2024 оны 1 дүгээр улирал дуустал нийт 15 сарын хугацаанд хэрэгжүүлнэ.

Найм. Хөтөлбөр хэрэгжүүлэх хөрөнгийн эх үүсвэр

8.1.Хөтөлбөрийг хэрэгжүүлэхэд шаардлагатай хөрөнгийг дараах эх үүсвэрээр бүрдүүлнэ:

8.1.1.Улсын болон орон нутгийн төсвийн хөрөнгө;

8.1.2.Хөгжлийн хөтөлбөрүүд, олон улсын байгууллагын тусламжийн хөрөнгө;

8.1.3.Хувийн хэвшлийн хандив, тусламжийн хөрөнгө;

8.1.4.Бусад.

8.2.Хөтөлбөрийг хэрэгжүүлэх арга хэмжээний төлөвлөгөөний дагуу тухайн жилийн үйл ажиллагаанд шаардагдах хөрөнгийг жил бүрийн аймгийн төсөвт тусган санхүүжүүлнэ.

Ес. Хөтөлбөрийн хэрэгжилтийн шалгуур үзүүлэлт

9.1.Хөтөлбөрийн хэрэгжилтийг дараах шалгуур үзүүлэлтээр дүгнэнэ:

9.1.1.Аймагт шилжин ирсэн иргэдийн бодит тоон өсөлт 20%-иас дээш нэмэгдсэн эсэх;

9.1.2. Үйлдвэрлэл, худалдаа үйлчилгээ, бүтээн байгуулалт, аялал жуулчлал гэх мэт бүх төрлийн үйл ажиллагаа эрхлэгч аж ахуйн нэгжийн тооны өсөлт;

9.1.3. Аймаг орон нутагт шинээр бий болсон ажлын байрны тоо;

9.1.4. Иргэд, аж ахуйн нэгж, байгууллага, олон нийт рүү чиглүүлэн зохион байгуулсан ажлууд, түүний үр дүн;

9.1.5. Монгол Улсын Засгийн газрын 2020 оны 206 тоот тогтоолоор батлагдсан “Бодлогын баримт бичгийн хэрэгжилт, захиргааны байгууллагын үйл ажиллагаанд хяналт-шинжилгээ, үнэлгээ хийх нийтлэг журам”-ын “Хүн амын нэмэгдэлтийн хувь, төсвийн байгууллага, хуулийн этгээд тэдгээрийн салбар нэгжийн болон албан хаагчийн шилжилтийн хувь” шалгуур үзүүлэлтээр хэрхэн дүгнэгдсэн байдал;

9.2. Ажлын хэсэг хөтөлбөрийн шалгуур үзүүлэлт бүрээр хүрэх зорилтот үзүүлэлтийг жил бүр тогтооно.

9.3. Хөтөлбөрт дэвшүүлсэн зорилт, үйл ажиллагааны хэрэгжилтийн явцад ажлын хэсгээс хяналт тавина.